

Pissutsit immikkut ittut inuiaqatigiinnut kalaallinut immikkut pingaarutillit (Covid-19 pissutsit) pillugit Naalakkersuisut Siulittaasuanit nassuiaat.
(Naalakkersuisut Siulittaasuat)

Saqqummiussissut

COVID-19-ip Kalaallit Nunaanni paasineqareernerata kingorna, nunatsinni tunillaassuunnissaata killilersimaarnissaanut iliuusissanik Naalakkersuisut partiit siuttui peqatigalugit sakkortuunik iliuuseqarput. Meeqqat atuarfii, ilinniarsiit sulliviillu matuneqarput. Nunatta iluani aammalu nunatsinnut angallaneq killilersorneqalerpoq.

Nunatsinni tunillatsissimasut tamarmik aqqereersimalerput, maannakkullu piffissami aalajangersimasumi tunillatsittoqarsimangilaq. Maannamut pisut iliuuseqarfiginerat iluatsilluarpoq.

COVID-19-ip iliuuseqarfigisinaanissaanut inooqataaffiginissaanullu inuiaqatigiit ataatsimut isigalugit piareersartillugit tamatuma tungaanut piffissaq atornerparpoq. Upalungaarsimanissamut pilersaarutit, inuussutissarsiutinut suliaassaqarfinnullu assigiinngitsunut ilitsersuutit inassuteqaatillu suliarineqarput aammalu tunillaassornerit passussinnaanissaannut maani nunatsinni COVID-19-mik misissuutinik periarfissaqalerpoq.

Maannakkut nunarsuarmut avatangiisitsinnut ammarnissap tungaanut qanoq ingerlassanerluta isumaliutersuutiginnissaa piffissanngorpoq. Maannakkut sapsuupajaartumik periusissaqalerpugut, upalungaarsimasoqarpoq, attaveqatigiinnermut pilersaaruteqalerpoq aammalu qanoq pisoqarsinnaanera piareersimaffigineqarpoq. Taamaalilluni siumut isigisumik ataatsimoorluta pisunut tunngatillugu tassangaaniit qanoq ingerlaqqissanerluta qimerloornissaa piffissanngorpoq.

Inuiaqatigiit matoqqatinnerat annertuumik aningaasatigut akisuvoq. Kalaallit Nunaata aningaasaqarneranut siunnersuisooqatigiit naliliippat BNP 3,8%-inik qaffannani, periarfissami pingaarnermi 3%-inik appartussaasoq. Ajornartoornerup annertussusaa sivisussusaalu apeqqutaalluni katillugit 2,5 mia. koruuninik annertussusilinnik taarsigassarsisoqartariaqalersinnaavoq. Taamaattumik nappaatip siaruarnissaata aarlerinaateqarnerata aammalu inuiaqatigiinni soqutigisat nalinginnaasut oqimaatigiissaarnissaat eqqarsaatigalugu, nunatta ammarnissaa qanoq pissanersoq pilersaarusiulernissarput pisariaqarpoq.

Kalaallit Nunaat nunarsuup sinneranut ammaassinerulerpat, innuttaasut tunillatsissinnaanerisa aarlerinaateqarnera pinngitsoorsinnaanngilarput. Taamaattumik immikkoortukkaartumik ammaanissamut tassunga Danmarkimi tunillaassuunnerit 1-imiit annikinneruinnarnissai, taassumalu appariartornera ilutigalugu ammarneruleriartornissaq, tunngavissaatinneqarpoq.

Nassuerutigisariaqarparput tunillatsinnissamik pitsaaliuinnermut akisussaaffiup ilarujussua innuttaasuniimmat. Innuttaasut inassuteqaatinik malinninnerisigut, tunillatsissinnaaneq aarlerinaateqanginnerusussaavoq, taamaalillunilu innuttaasut inassuteqaatit malinnippasigut, aarlerinaateqarnerusussaalluni. Tamanna isumaqarpoq inooqatigiinnermi pissusilersortarnerit qanoq inissisimalernissatsinnut aalajangiisuulluinnartut. Erseqqissarneqassaaq innuttaasut ilai ersiutinik malugisimasaqaratik tunillatsissimasinnaammata, taamaalillutillu nalusaminnik tunillaassuisinnaallutik. Eqqasuuteqarnanga oqarsinnaavunga, innuttaasut arlaalluunniit

piaaralutik nappaammik tunillaanaviangimmata, taamaattumik sillimaniarluni iliuusissat aammalu pitsaaliuilluni iliuuseqarnerit pingaaruteqartorujussuupput.

Angalasut tikinnissaannik killilersuiuaannarsinnaanginnerput nassuerutigalugu, ammaanissamut ikaarsaariartuaarneq pingasoqiusamik avinneqassasoq aammalu periusissiami tassani periarfissaq aappaat sulissutigineqassasoq Naalakkersuisut toqqammavigaat. Tamatuma kingunerisaanik aallarnissaq ullunik marlunnik sioqqullugu aammalu tikereernerup kingorna ullut tallimassaanni corona-mut misissortittarnissaq kiisalu sapaatip akunneranut tikittut annerpaamik 600-it ataqatigiissinneqarput. Aammalu Danmarkimi tunillaassuunneq apeqqutaatillugu ammarnerusarnissaq imaluunniit immikkoortuni sivitsuisarnissaq.

Ataatsimoorluta siumut isigissaagut, ajornartorsiornermi ataatsimooqatigiissasugut, tamanna innuttaasut qinikkanut naatsorsuutigaat. Naatsorsuutigaara neriuutigalugulu Inatsisartuni ilaasortat pilersitsiviulluartussanik siunnersuuteqassasut. Suliassaq manna politikikkut suut akuerisinnaanerivut oqallisigalugu aammalu avissaartuuffiusussat tunulliullugit.